




ANTON BLOK Y JEFF VAN DER LINDE

HARI AWOR...

UN JOKE 'PERSISTENCE' RIBA
LAMA BALORA NA
235 MIL DOLLAR





Nos afspraak cu Anton Blok (40) y Jeff van der Linde (37) tabata na e conocido Marisol Building, un proyecto exitoso di Anton. E kantoer di Anton, cu ta riba e piso mas halto, ta impresionante. No necesariamente den luho, pero door di e bunita bista riba Playa i lama. Bo no por hera e bista pasobra tur e murayanan rond di e oficina ta di glas. Anton ta conoci den e mundo di negoshi na Aruba, e ta CEO di CRD Group cu ta consisti di diferente companianan riba tereno di retail, construccion, maneho y desaroyo di proyectonan den real estate cu ta activo na Aruba y den Caribe. Jeff ta project manager den area di construccion y real estate di e grupo y a cuminsa traha cu Anton seis aña pasa despues cu e la haya cu a bira tempo pa un cambio di trabou. *Trahando na refinaderia tur dia e tabata bin tur sushi cas y ta hole na gasoline*, segun Anton.

Den su bida, Anton, semper tabatin un gran amor pa e lama (di Aruba) y for di e tempo cu e tabata mucha, e tabata bay riba lama pa surf of ta subi su so riba un catamaran pa desaparece un par di ora riba nos dushi lama. P'esey tambe, e no tabata nada straño ora cu el a dicidi di compra su mesun boto. *Na September 2001 mi a planea pa bai Boston pa compra un boto, ora un amigo a yamami for di Merca contando cu riba television nan tabata muestra con World Trade Center na New York tabata wordo ataca cu avionnan. Mi a bis'e cu nada no ta bai pasa, pero ni binti minuut despues e ta yamami bek puntra mi si mi a wak television. El a puntrami tambe mesora kico mi ta bay haci cu mi plan di biaha pa Merca. Logico, mi a bise cu ami*

no ta bai Merca mas den un situacion asina pa compra un boto. Asina tambe, na Januari 2002, Jef y ami a cuminsa papia pa construi nos mesun boto. Locual semper ami a siña na scol tabata cu tur cos cu bo kier sa, bo por siña. Asina Anton i Jeff a cuminsa busca informacion unda cu nan por a haya, riba con pa construi nan boto. Cu su amor pa lama y Jeff – cu ta un 'self made' carpinte fini di profesion – a muestra di ta un combinacion persistente. *Mi tabata den basta proyecto grandi di construccion pero esaki tabata un 'challenge' hopi grandi di berdad* Anton ta conta. A base di nan 'research' Anton a dicidi pa un boto di e tipo diseño lobster di 33 pia; un boto uza hopi den e area noord oost di Merca pa coy lobster. Na Aruba nos tin olanan cortico y skerpi cu ta similar na e olanan na e parti aki di Merca. E duo a bai diferente 'boatshows' na Merca unda nan a papia cu diferente arquitecto. Anton: *ta na un di 'boatshows' aki mi a muestra Jeff riba un boto similar cu mi kier traha cu tur e aspectonan di luho den dje manera airco, electricidad, 'auto pilot' y un generator. Mi mester a hari ora mi a bisa Jeff cu ta un boto similar nos ta bay traha y el a reacciona manera ta joke mi ta haciendo.* Na Merca un boto nobo di e tipo lobster di 33 pia asina ta costa alrededor di 400 mil dollar. E botonan ta di marcanan mundialmente conoci manera Hatteras y Bertram. *Ora nos a cuminsa traha e boto e tabata manera depende riba un garoshi kibra. Nos a siña hopi pasobra e nivel di e trabou aki bo no ta hay' e na Aruba normalmente, pero e amor cu Jeff tin pa e trabou y e respet pa traha cu e tipo di palo a pone nos crece hopi pa logra e calidad cu nos tabata kier.*

Durante e proceso di construccion, foutnan a wordo haci pero e producto final no a resulta menos den calidad, capacidad ni carpinteria compara cu e miho marcanan na Merca. E ironia tabata, cu tur e amantenan di boto y amigonan di Anton y Jeff no por a kere nunca cu nan lo logra traha e 'lobster boat' aki. Nan tabata hasta harinan, specialmente ora nan a test e boto den awa y e motor a coy aire y no por a funciona. Pero e boto no yama por nada 'PERSISTENCE' y e siguiente biaha cu nan a baha e boto nan a ranca straight pa *Monjes* (dilanti e costa di Venezuela). Anton ta conta cu 'e mesun amigonan a baha cu nan den nan mesun boto riba lama, tur tabata spera cu nan a hiba suficiente 'life jackets' den caso e boto mester a sink. Pa colmo nos a yega Aruba bek, prome cu e otro grupo di botonan.' For di e dia ey 'PERSISTENCE' a wordo acepta y respecta den e mundo di amantenan di boto na Aruba. A tuma Jeff y Anton un aña y mey – en bes di un aña cu tabata e plan – pa construi 'PERSISTENCE'. Awo e meta ta pa bende e boto aki y traha un nobo riba peticion. E boto ta aperece riba e website di un famoso agente na Merca (Allied Richard Bertram). Den e aventura cu nan a bai aden nan a haya hopi conocimiento di e materia y ta keda aserca awor, tanto na Aruba como pafo di Aruba pa duna conseho riba e tereno aki. Tanten no bende e boto ta sigui haci bon uso di dje, entre otro pa participa den torneo di piscamento. Anton y Jeff a muestra **"cu pasenshi bo ta gana gloria"**! 🇵🇸

